

**TEKS UCAPAN**

**YB. DATO' SRI ISMAIL SABRI BIN YAAKOB  
MENTERI KEMAJUAN LUAR BANDAR DAN WILAYAH**

**SEMPENA**

**MAJLIS PERASMIAN KONVENSYEN  
MRSM ULUL ALBAB 2017**

**“QURANIK, ENSIKLOPEDIK, IJTIHADIK”**

**DEWAN UTAMA,  
HOTEL PREMIERA KUALA LUMPUR**

**10 APRIL 2017 (ISNIN)  
WAKTU KETIBAAN : 8.50 MALAM**

## **SALUTASI SEWAJARNYA**

Bismillahirrahmanirrahim.

Assalamualaikum Warahmatullahi Wabarakatuh,  
Salam Sejahtera.

Tuan-tuan dan puan-puan, hadirin yang dirahmati Allah sekalian.

1. Alhamdulillah, bersyukur saya ke hadrat Illahi dengan izin dan keberkatan-Nya dapat kita sama-sama berkumpul dalam majlis yang penuh bermakna sempena Konvensyen MRSM Ulul Albab 2017. Terima kasih diucapkan kepada YAB Timbalan Perdana Menteri yang kita hormati, Dato' Seri Dr. Ahmad Zahid bin Hamidi atas kesudian melapangkan masa menyempurnakan majlis pada malam ini.
2. Setinggi-tinggi ucapan tahniah juga diucapkan kepada semua pihak dan warga MARA yang telah bersungguh-sungguh dalam merealisasikan konvensyen yang penuh bermakna ini bagi meraikan Huffaz yang sedang belajar dan yang telah berjaya dalam bidang masing-masing.
3. Program Ulul Albab MRSM mula dilaksanakan pada tahun 2009 di MRSM Kota Putra (Terengganu). Dengan kejayaan yang memberangsangkan dari sudut akademik dan sahsiah pelajar, pada tahun 2010 MRSM Gemencheh (Negeri Sembilan) pula melaksanakan Program Ulul Albab dan diikuti MRSM Kepala Batas (Pulau Pinang) pada tahun 2011. Pada tahun 2016, MRSM Sungai Besar (Selangor) telah dibuka untuk melaksanakan Program Ulul Albab.
4. Program Ulul Albab ini ialah satu program pendidikan gabungan antara program pendidikan MRSM sedia ada (Sains Tulen) dengan program aliran agama termasuk Tahfiz Al Quran dan Al-Sunnah sebagai generasi Ulul Albab. Kewujudan program ini bertujuan untuk kita melahirkan ahli profesional dan teknokrat serta mahir dalam bidang keagamaan berlandaskan al-Quran dan al-Sunnah pada masa akan datang.
5. Inilah yang kita namakan sebagai Program Ulul Albab yang diperkenalkan dalam sistem pendidikan MRSM bagi melahirkan pelajar yang mempunyai keupayaan menghadapi dunia globalisasi dan serba mencabar. Mengikut pandangan Ibn Mundzir; Ulul Albab bermaksud "sekelompok manusia yang bertaqwa kepada Allah, berpengetahuan tinggi dan mampu menyesuaikan diri dalam segala lapisan masyarakat, elit ataupun marginal". Program ini telah melahirkan generasi Ulul Albab yang berkebolehan menghafaz 30 juzuk Al-Quran serta memahami tuntutan Al-Quran berdasarkan konsep baca, ingat, faham, fikir, amal dan sebar.

Tuan-tuan dan puan-puan, hadirin yang dirahmati Allah sekalian.

6. Objektif utama penubuhan MRSM Ulul Albab ialah untuk melahirkan generasi Al-Quran yang beriman, bertaqwa, berilmu, berakhlak mulia, berketrampilan, bertanggungjawab dan dapat berbakti kepada agama, bangsa dan negara. Pada masa yang juga ia melahirkan pelajar yang berlatarbelakangkan Sains dan Tahfiz al-Quran yang dapat memenuhi syarat untuk mengikuti pengajian dalam bidang profesional dan teknikal di mana-mana universiti yang tersohor diseluruh dunia seperti Universiti Al-Azhar, Mesir dan seumpama dengannya.

7. Setelah Program Ulul Albab dilaksanakan di empat MRSM, pelbagai kejayaan telah dicapai. Sehingga kini, MARA telah mengeluarkan empat kohort daripada MRSM Kota Putra, tiga kohort daripada MRSM Gemencheh dan dua kohort daripada MRSM Kepala Batas. Setelah lapan tahun program ini dilaksanakan di MRSM Ulul Albab, MARA telah berjaya melahirkan 1,164 orang huffaz.

Tuan-Tuan dan puan-puan yang dihormati sekalian,

8. Kemajuan sesebuah negara pada era ini banyak bergantung kepada kemajuan pemikiran serta keupayaan modal insan yang mampu dijana oleh sistem pendidikannya. Apatah lagi bagi sebuah negara seperti Malaysia yang ingin memacu ekonomi berasaskan pengetahuan, sudah pasti memerlukan modal insan kelas pertama. Oleh yang demikian, sebagai sebuah organisasi yang bertanggungjawab memartabatkan Bumiputera, Majlis Amanah Rakyat (MARA) telah memajukan terus sistem pendidikan yang sedia ada supaya selari dengan perubahan dan keperluan semasa. Program Ulul Albab telah menyumbang kepada anjakan paradigm sistem MRSM sebelum ini. Pada masa kini, generasi muda yang bakal mewarisi kepemimpinan negara perlu dilengkapi dengan pelbagai ilmu agar cabaran globalisasi dapat ditempuhi seterusnya mampu mengangkat nama negara di persada dunia dan memartabatkan bangsa Melayu.

9. Dikesempatan yang sangat bermakna ini, saya juga ingin mengucapkan setinggi-tinggi tahniah dan terima kasih kepada para pendidik yang telah berjaya mendidik anak-anak kita menjadi yang terbaik. Saya sedar dan yakin bahawa banyak cabaran yang perlu dihadapi oleh para pendidik MARA pada abad ke-21 untuk menghasilkan kumpulan pelajar terbaik bagi mendepani cabaran pada era tersebut. Antara bidang pendidikan abad ke 21 yang perlu kita terokai adalah pendidikan yang memfokuskan kepada energy transitions, consumer health and wellness, materials revolutions dan transformasi digital. Fokus bidang-bidang baru sebegini akan membantu kita untuk melahirkan generasi yang berilmu untuk berfikir, bertindak dan menghasilkan sesuatu yang bermanfaat berlandaskan skop dan teknologi yang global dan terkini, serta berupaya menangani gelombang perkembangan dan perubahan masa kini.

10. Akhir kata, saya mengucapkan setinggi tahniah kepada MARA yang telah berjaya mengelolakan konvensyen ini dengan sempurna. Semoga penganjuran konvensyen ini menjadi pencetus semangat kepada pelajar huffaz untuk lebih berjaya pada masa akan datang. Semoga tuan-tuan dan puan-puan, para huffaz sekalian terus menjadi penyuluh dan suri teladan dalam memartabatkan tradisi keilmuan dan membentuk kesempurnaan akhlak generasi muda.

11. Marilah kita berdoa ke hadrat Allah s.w.t agar segala usaha yang kita lakukan ini mendapat kerahmatan dan barakah sepanjang masa, mendatangkan manfaat kepada semua pihak di dunia dan di akhirat. Mudah-mudahan kita dikurniakan kekuatan untuk terus berbakti kepada agama, bangsa dan negara.

Sekian, Wabillahi Taufik Walhidayah  
Wassalamualaikum warahmatullahi wabarakatuh.